

Kweli, Msingi wa Tabia

Moyoni mwangu nimeliweka neno lako, Nisije nikakutenda dhambi.
Zaburi 119:11.

Wale wanaojifunza Biblia, wanaotafuta ushauri kwa Mungu na kumtumaini Kristo watawezesha kutenda kwa hekima kila wakati na katika kila hali. Kanuni njema zitadhirishwa katika maisha halisi. Acha tu ukweli wa wakati huu upokelewe vizuri na kuwa msingi wa tabia, na utazaa uthabiti wa nia, ambao kutamanishwa na anasa, kubadilika badilika kwa desturi, fedheha ya kuupenda ulimwengu na kelele za moyo zinazodai anasa havitakuwa na nguvu ya kuushawishi. Dhamiri lazima kwanza iangaziwe, nia lazima itiihwe. Kupenda kweli na haki lazima kutawale nafsi na tabia ambayo mbingu zitaweza kuikubali itaonekana.

Tunavyo vielelezo bayana vya nguvu itutegemezayo imara, kanuni za kidini. Hata hofu ya kifo haikumfanya Daudi aliyekuwa karibu kuzimia, kunywa maji ya Bethlehemu, ili kupata kile ambacho mashujaa walihatarisha maisha yao kwa ajili yake. Makanwa ya simba yaliyofunguliwa hayakumfanya Danieli kuacha kufanya maombi kila siku, wala tanuru la moto halikumfanya Shadraka na wenzake kuisujudia sanamu aliyoiweka Nebukadreza.

Vijana wenye msimamo imara watajitenga na anasa, hawatatishwa na maumivu na kuwa jasiri hata katika tundu la simba na tanuru la moto kuliko kutokuwa wakweli kwa Mungu. Zingatia tabia ya Yusufu. Maadili yalipimwa vikali, lakini ushindi wake ulikuwa mkamilifu... Kanuni ile ile isiyopindishwa ilidhihirika katika kila jaribu. Bwana alikuwa pamoja naye na neno Lake lilikuwa ni sheria.

Uthabiti huo na kanuni isiyoyumbishwa zinang'aa kwa mwangaza mkali zikilinganishwa na udhaifu na uzembe wa vijana wa zama hizi ...

Dhana kwamba lazima kukubali njia za ukaidi za watoto ni makosa. Elisha, mwanzoni kabisa mwa kazi yake alidhihakiwa na kubezwa na vijana wa Betheli. Alikua mtu mpole sana, lakini Roho wa Mungu alimhimiza kutangaza laana juu ya waliomdhihaki. Walikuwa wamesikia kuhusu kupaa kwa Elia na walifanya tukio hili muhimu kuwa kejeli. Elisha alidhihirisha kwamba hakupaswa kudharauliwa na watu wazima au vijana, katika wito wake mtakatifu.

Walipomwambia apae, kama Elia alivyofanya mbele yake, aliwalaani kwa jina la Bwana. Hukumu ya kutisha iliyowajia ilikuwa ni ya Mungu. Baada ya tukio hili, Elisha hakupata shida tena katika utume wake. Kwa miaka 50 aliingia na kutoka katika malango ya Betheli na kupita mji kwa mji, akipita katika makusanyiko ya watu wabaya na wafidhuli wasiofaa na vijana waovu, lakini hakuna hata mmoja aliyemdhihaki au kudharau sifa yake ya kuwa nabii wa Mungu. Tukio hili moja lenye nguvu ya kutisha mwanzoni mwa kazi yake lilitosha kumfanya aheshimiwe katika maisha yake yote. **(Testimonies for the Church 5:43,44)**